

## **Incumbensa da la fracziun da la PS concernent la finanziaziun da projects da digitalisaziun (infrastructura ed ulteriurs secturs)**

En connex cun la revisiun totala da la lescha per promover il svilup economic en il chantun Grischun ha il cussegl grond stgaffi ina reserva dad 80 milliuns francs per "infrastructuras relevantas per il sistem". Fin oz è però vegnids inoltrads respectivamain sustegnids mo paucs projects.

Il medem mument vegn discurrì dapertut da la "digitalisaziun". Senza dubi è per exempel lingias sveltas ina infrastructura relevanta per il sistem per l'entir chantun. Ma er la scolaziun e la furmaziun supplementara da las branschas sco er da las lavurantas e dals lavurants ch'èn pertutgads da la digitalisaziun; in'offensiva da furmaziun davart dumondas tar schanzas, pussaivladads e ristgas da la digitalisaziun; in center da cumpetenza per cussegljar vischnancas, IPM e persunas privatas; la colliaziun da scolas medias e da centers da sanadad en las regiuns cun ulteriuras instituziuns da furmaziun e cun l'ospital chantunal a Cuira; in post d'intermediaziun tranter industria / perscrutaziun e forzas spezializadas; la promoziun da la digitalisaziun en il turissem e bler auter è secturs, nua che las pretensiuns vegnan a crescer per il chantun, per las vischnancas e per las regiuns precis uschia sco per l'economia e per persunas privatas.

Cun acceptar las intervenziuns Stiffler (Cuira) e Casanova-Maron l'onn 2016 ha il cussegl grond ultra da quai gia mussà differentas giadas ch'el spetga dapli activitads en il sector da la digitalisaziun dal chantun.

Plinavant poi vegnir fatg quint ch'in stausch da digitalisaziun rinforzia marcantamain ina caratteristica actualmain centrala per la qualidad dal lieu dal chantun Grischun sco chantun d'abitar e da lavurar. Da quai pon profitar en spezial er vischnancas en lieus decentralas.

Las sutsegnadras ed ils sutsegnaders incumbenseschan perquai la regenza da stgaffir las basas necessarias per che la mesadad da la reserva per infrastructuras relevantas per il sistem (40 milliuns francs) possia vegnir duvrada per dar in stausch a la digitalisaziun en il Grischun.

Cuira, ils 16 d'avrigl 2018

**Peyer**, Atanes, Baselgia-Brunner, Bucher-Brini, Cahenzli-Philipp (Vaz sut), Caviezel (Cuira), Deplazes, Locher Benguerel, Monigatti, Perl, Pult, Degiacomi